

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Parashah 27: Tazria (תזריע): Swanger word

Verder het יהוה met Moshe gepraat en gesê: “Praat met die kinders van Yisra’el en sê: ‘As ‘n vrou swanger word en geboorte gee aan ‘n seun, sal sy sewe dae lank onrein wees; soos in die dae van haar menstruasie, sal sy onrein wees. Lev. 12:1 en 2 – PWL¹

Torah: Lev. 12:1 tot 13:59

Haftorah: 2 Kon. 4:42 tot 5:19

Hernieuwe Verbond: Matth. 8:1 tot 4; Matth. 11:2 tot 6; Mark. 1:40 tot 45; Luk. 2:22 tot 24; Luk. 5:12 tot 16; Luk. 7:18 tot 23.

Hierdie notas is aanvullend tot die vorige notas vir parashah 27 wat afgelaai kan word by: [Parashah27Notas14](#) of deur dit aan te vra by kontak@nuwelied.info.

The attitude of the average Christian today is relax and be raptured. But He is coming... and when God gets angry you’ve no idea what it is. Like a thousand volcanoes exploding. He has appointed a day in which He is going to judge the world and the poor blind world doesn’t know much about it and the poor blind church doesn’t think much about it now – Leonard Ravenhill.

If I am filled with the Holy Spirit the same things that grieve the Holy Spirit will grieve my spirit – Leonard Ravenhill.

Our God is a consuming fire. He consumes pride, lust, materialism, and other sin – Leonard Ravenhill.

Midrash (Torah Bespreking)

Omrede daar nie hierdie jaar ‘n dertiende maand by die Hebreeuse maankalender bygevoeg word nie, word parashah *Tazria* en parashah *Metzora* saam gelees. Beide hierdie parashot vorm egter ‘n eenheid van onderrig en instruksies oor:

- Melaatsheid (velaandoenings), wat ‘n toestand van onreinheid veroorsaak, hoofsaaklik weens sonde, naamlik die oortreding van Torah, asook die onderrig en instruksies vir die reiniging van melaatses.
- Onreinheid wat nie weens sonde is nie, maar onreinheid wat ontstaan wanneer byvoorbeeld ‘n vrou geboorteskenk (Lev. 12:1 tot 8), of deur aanraking van ‘n karkas

¹ PWL Vertaling (Pad van Waarheid tot die Lewe) kan gratis afgelaai word by www.padwlewe.ch

(aas) (Lev. 11:24 tot 40; Num. 19:11 tot 17), of liggaamsuitskeidings (vloeiing) (Lev. 15:2 tot 33) of deur kontak met 'n afgestorwene (Lev. 19:11 tot 13). Hierdie verwerfde onreinheid kan egter verwyder word deur die voorgeskrewe ritueel / seremonie (Byvoorbeeld: Lev. 11:24 en 25; Lev. 14:1 tot 32; Num. 19:1 tot 19).

Hierdie word algemeen as die seremoniële wette beskou en was alles 'n skadubeeld ('n sinnebeeld) van die toekomstige verlossing in Yeshua. Daarom volg ons nie meer die seremoniële wette vir 'n statusverandering van onrein na rein nie, want in Yeshua is dit vervul. MAAR, die beginsels waarvolgens ons as wedergebore kinders van YHVH onrein kan word het nie verander nie!! Die beginsel waarvolgens ons weer rein kan word het ook nie verander nie, maar wel die wyse, naamlik soos dit in Yeshua Messias vervul is.

Daarom moet ons steeds kan onderskei tussen dit wat rein en dit wat onrein is, want dit beïnvloed ons verhouding met Vader-God en bepaal of ons in YHVH se Teenwoordigheid mag kom en of ons YHVH se seëninge deelagtig gaan wees.

Dit is derhalwe noodsaaklik om altyd terug te verwys na parashah *Tazria* wanneer parashah *Metzora* bestudeer en bespreek word, want die twee vorm 'n eenheid.

Melaatsheid: YHVH se Tugtiging

Vir die doel van verdere bespreking is dit veral noodsaaklik om te verstaan wat is die Skriftuurlike betekenis van melaatsheid soos in die Torah bespreek word.

Dit kan soos volg opgesom word: Melaatsheid (Hebreeus: *tsara'at*) wat in Torah beskryf word moet nie slegs gesien word as melaatsheid soos ons dit vandag ken nie, maar ook as 'n verskeidenheid van siekte toestande wat die vel aantast, sowel as voorwerpe soos klere en huise. *Tsara'at* moet daarom gesien word as 'n toestand van onreinheid en onvolmaaktheid volgens YHVH se standaard. Dit is 'n veltoestand en besmetting van voorwerpe wat ontstaan het as gevolg van sonde, naamlik die oortreding van YHVH se Torah, veral weens sonde van die tong, naamlik kwaadspraak (skinder) wat in Hebreeus *l'shon hara* genoem word en wat in Parashah 28 meer volledig bespreek sal word.

Tsara'at was daarom YHVH se wyse om te waarsku dat 'n persoon 'n toestand van onreinheid weens sonde bereik het – 'n toestand van 'n versteurde verhouding tussen YHVH en die persoon en wat versoening deur berou, vergifnis en terugkeer tot Torah-gehoorsaamheid vereis. Slegs dan sou genesing van die *metzora* (die melaatse) plaasvind. *Tsara'at* is dus beide 'n fisiese en geestelike toestand van onreinheid.

Daarom kon 'n persoon wat melaats is (oortrek is met *tsara'at*), nie in YHVH se Heiligdom (die tabernakel) ingaan nie. Melaatsheid (*tsara'at*) volgens Torah kan dus gesien word as YHVH se tugtiging van sy kinders.

Maar *tsara'at* kan egter ook gesien word as YHVH se genade – Sy liefdevolle tugtiging. Dit was 'n sigbare manifestasie van YHVH se 'ontvredeheid' met Sy kind se optrede en 'n tugtiging wat die geleentheid bied vir *teshuvah*, naamlik bekering met berou en om terug te keer om YHVH se Torah te hoor en te doen!

Verskeie teksverse bevestig die feit dat YHVH-Vader elkeen wat Hy liefhet soos enige aardse vader ook tugtig.

want יהיהּ wys hulle tereg wat Hy liefhet, soos 'n vader sy seun tereg wys. Spr. 3:12 – PWL.

want YHVH tugtig hom wat Hy liefhet, en Hy kasty elke seun wat Hy aanneem. As julle die tugtiging verdra, behandel God julle as seuns; want watter seun is daar wat die vader nie tugtig nie? Heb. 12:6 en 7

Almal wat Ek liefhet, bestraf en tugtig Ek. Wees dan ywerig en bekeer jou. Open. 3:19.

Waarom Teenspoed, Hartseer En Lyding?

Ons kan dus die vraag vra: Hoe tugtig Vader-God onder die hernieude verbond die wat Hy liefhet? Ons weet, want ons het dit almal al ondervind, dat teenspoed wat met siekte, hartseer en lyding gepaardgaan, deel van die lewe is. Is dit YHVH se tugtiging?

Wanneer teenspoed tref, vra gelowiges dikwels: *Hoe kon God dit toelaat* of *Hoe kon God dit gedoen het?* Is YHVH dan nie 'n liefdevolle God wat ons belange te alle tye op die hart dra nie? Ons weet dat Hy Almagtig en Alomteenwoordig is en daarom die teenspoed, hartseer en lyding kon verhinder het. Onthou: YHVH het nie net liefde nie, maar Hy is liefde (1 Joh. 4:16). Ware liefde is tog om te voorsien en te beskerm. Is teenspoed met die gepaardgaande hartseer, pyn en lyding dan die wil van 'n liefdevolle God?

Ons kan ook vra: Indien ons sê dat teenspoed, soos byvoorbeeld ernstige siekte of die dood van 'n geliefde, YHVH se wil is, bedoel ons dan dat Hy dit toelaat of bedoel ons dat Hy dit so bewerkstellig het? Indien ons glo dat YHVH dit bewerkstellig, dan kan ons wel vra of dit ware liefde is? Sommige glo dat dit wel die wyse is hoe YHVH dié tugtig wat Hy liefhet. Maar, watter aardse ouer sal egter sy kind met ernstige siekte of die dood van 'n geliefde tugtig? Sal 'n aardse ouer sy kind op so 'n wyse tugtig? Dit is nie liefde nie en God is tog liefde! Indien teenspoed wel ons Vader se tugtiging is, dan beteken dit dat ons dit verdien. Dan kan ons nie YHVH blameer nie, maar net onself.

Indien ons egter glo dat ons Vader nie teenspoed in ons lewens bewerkstellig nie, maar dit slegs toelaat, dan beteken dit dat die oorsaak en oorsprong van teenspoed nie by Hom gesoek moet word nie. Dan laat YHVH dit toe sonder om dit te keer. Dan is die oorsaak en oorsprong of onself, of Satan wat kom om te steel, te slag en te verwoes (Joh. 10:10), of bloot 'n sameloop van omstandighede waaroor ons nie beheer het nie.

Die vraag is wel: Kan ons iets doen om teenspoed te verhinder en om YHVH se seëninge deelagtig te wees?

Die Mens Se Verantwoordelikheid

Deur teenspoed as die wil van YHVH te beskou, onthef die mens homself van enige verantwoordelikheid en aanspreeklikheid. Dit is om jouself te verontskuldig en die blaam, of die oorsaak, elders te plaas. Die wat hierdie standpunt huldig verontagsaam egter die woorde van Yeshua in Joh. 10:10, naamlik:

Die dief kom net om te steel en te slag en te verwoes. Ek het gekom, dat hulle lewe en oorvloed kan hê.

Hierdie Skrif is tog duidelik dat die dief, naamlik Satan, die een is wat steel, doodmaak en verwoes. Satan is daarop uit om alles van jou te steel, dood te maak en te vernietig indien hy die geleentheid kry. Hy is dus die vyand wat gekeer en oorwin moet word!!

Volgens Joh. 10:10 is dit tog ook duidelik dat Yeshua gekom het dat ons lewe en oorvloed kan hê. Hierdie lewe en oorvloed is die ewige lewe deur vertrouwe in Yeshua as die Messias,

maar wat manifesteer in die lewe van oorwinning en oorfloed voorsiening in al ons behoeftes. Dit is dus YHVH se wil om die mens in elke area van sy lewe te seën.

Wat is dus die mens se verantwoordelikheid om die Vader se lewe in oorfloed deelagtig te wees? Die antwoord kry ons in Jakobus 4:6 tot 10, naamlik:

*Ons Meester gee ons groter onverdiende guns, want Hy sê dit: "God verneder die trotses, maar aan die nederiges gee Hy onverdiende guns." **Wees dan gehoorsaam aan God en staan op teen die teëstander en hy sal van julle af wegvlug.** Kom nader na God toe en Hy sal nader kom na julle toe. Sondaars, reinig julle hande; twyfelaars, sonder julle gedagtes, wil en emosies af! Wees nederig, treur en huil. Laat julle gelag in rou verander word en julle blydschap in droefheid. Wees nederig voor יהוה en Hy sal julle oplig (PWL).*

Hiervolgens moet elkeen wat deur vertrouwe in Yeshua regverdig verklaar is, eerstens in alles aan YHVH gehoorsaam wees, en tweedens die teenstander (Satan) teenstaan. Hierdie twee aksies staan nie los van mekaar nie. Jy kan nie slegs een van die twee doen nie, maar jy moet beide doen in die volgorde om jou eers aan YHVH se Torah te onderwerp en dan Satan weerstaan. Op dié wyse sal die dief van jou af wegvlug. YHVH gaan nie ingryp nie indien jy nalaat om te doen wat Hy jou beveel het!! Indien jy jou verantwoordelikheid ontduik, kan YHVH nie anders as om "toe te laat" dat Satan van jou gaan steel, doodmaak en vernietig nie!

Dit is dus duidelik dat elkeen `n rol het om te vervul. Ons kan nie net agteroor sit en alles in die hande van YHVH laat nie. Elkeen moet aktief met die wil van die Vader meewerk. Ons kan nie toelaat dat Satan dit van ons steel wat deur YHVH se onverdiende guns ons toekom nie. Ons het die verantwoordelikheid om ons aan God te onderwerp, naamlik om aan Sy onderrig en instruksies (Torah) gehoorsaam te wees, en om dan Satan teen te staan! Niemand sal tog willens en wetens toelaat dat `n dief sy besittings steel nie! Nee, jy tref voorsorg teen diefstal en bied weerstand waar nodig. Wanneer jy jou verantwoordelikheid nagekom het, dan sal YHVH ingryp om jou te ondersteun en te beskerm.

Dikwels is die mens vir sy eie teenspoed, hartseer en lyding verantwoordelik. Die rede hiervoor is verkeerde keuses! YHVH het die mens geskape met `n soewereine wil. Elkeen is geskape met `n gewete, kreatiwiteit, emosies en die vermoë om te redener en besluite te neem. YHVH respekteer die mens se wil en sal nooit Sy wil op die mens afdwing nie.

Diegene wat keuses maak wat strydig met YHVH se wil en wette (geestelik- sowel as natuurwette) is, sal die gevolge moet dra en kan dan nie vir YHVH of Satan die skuld gee nie. Byvoorbeeld: Indien jy `n ongesonde lewenstyl handhaaf en YHVH se voedselvoorskrifte en natuurwette oortree, is die kans goed dat jy mettertyd gesondheidsprobleme sal ondervind. Hiervoor kan jy dan net jouself blameer, want wat jy saai, sal jy maai!

Vryheid van keuse is een van die belangrikste redes waarom mense se lewens, asook die wêreld in geheel, in `n toestand van ellende en wanorde is. Die geskiedenis is die bewys dat keuses deur mense en gesagsowerhede vir die meeste pyn, lyding, mislukkings en chaos verantwoordelik is. In al die keuses wat vir hierdie ellendes verantwoordelik was, en steeds is, is die Skepper van almal en alles nie betrek nie.

Dit is nie `n geval van YHVH wat nie betrokke wil wees nie, maar eerder weens die feit dat Hy nie betrek word nie. Die mens is dikwels van mening dat hy alles volgens eie wil en met eie vermoëns kan doen. Talle het `n gesindheid waar YHVH net ingelig word oor keuses en dan word Sy seën daarop verwag.

Opsommend

Melaatsheid (*tsara'at*) volgens Torah kan gesien word as YHVH se tugtiging van sy kinders. Hierdie siekte toestand was die waarskuwing en bevestiging dat Torah oortree was, spesifiek die sonde van *l'shon hara*, naamlik kwaadspraak (skinder). Sonde, naamlik die oortreding van Torah (1 Joh. 3:4) veroorsaak onreinheid – dit verander die mens se status van rein (Hebreeus: *tahor*) na onrein (Hebreeus: *tamay*). Diegene wat onrein is mag nie in YHVH se teenwoordigheid kom nie en maak die deur oop sodat Satan die reg het om te steel, te slag en te verwoes! Daarom het ons die verantwoordelikheid om deur die genade in Yeshua en gehoorsaamheid aan ons Vader se Torah rein en afgesonder (heilig) te lewe:

Want God het ons nie tot onreinheid geroep nie, maar tot heiligmaking. 1 Thess. 4:7

Nader tot God, en Hy sal tot julle nader. Reinig die hande, julle sondaars, en suiwer die harte, julle dubbelhartiges! Jak. 4:8

Soos gehoorsame kinders moet julle nie jul lewe inrig volgens die begeerlikhede wat tevore in julle onwetendheid bestaan het nie. Maar soos Hy wat julle geroep het, heilig is, moet julle ook in jul hele lewenswandel heilig word, omdat daar geskrywe is: Wees heilig, want Ek is heilig. 1 Pet. 1:14 tot 16

Wat staan ons te doen wanneer ons teenspoed, hartseer en lyding ondervind? Natan Lawrence som dit soos volg op:

Next time you have an ailment, a trial, a setback, or some other problem in life, before ascribing its occurrence simply to time and chance, reflect for a moment and consider this: perhaps, you are reaping the consequences for some sin that you have committed? Is there a sin in your life that you have not confessed and for which you have not repented? Is Elohim trying to get your attention? In the case of sickness, it could be as simple as you eating unhealthful foods or unclean meats, not getting enough exercise or enough rest. Or it could be the result of gossip, slander, bitterness, unforgiveness or anger. It could be smoking, excessive alcoholic consumption, sexual promiscuity... or violating some of YHVH's Torah commands that you know you should be keeping. (Tazria – <http://www.HoshanaRabbah.org>)

Bepeins of Bespreek

1. Lees Joh. 5:1 tot 15 en let veral op vers 14. Hier sien ons die verwantskap tussen sonde en siekte. Sal die voorstanders van die voorspoedleer en diegene met 'n genesingsbediening 'dit waag' om die sieke hierop te wys of te vra of selfondersoek al gedoen is of die siekte toestand nie dalk weens sonde is wat 'vertroetel' word nie?
2. Is alle siekte weens sonde? Wat van geneties-oorerflike siektes, asook chemiese besoedeling van die lug, water en voedsel waaroor ons geen of weinig beheer het en wat op die langduur sekere siektes, soos kanker, longkwale, ens. kan veroorsaak? Wat van Ex. 20:5 waar YHVH sê:*wat die misdaad van die vaders besoek aan die kinders, aan die derde en aan die vierde geslag van die wat My haat?* Kan ons die gevolge van die sondes van ons voorouers 'kanselleer'? Is die antwoord in Ex. 20:6? Is Torah-gehoorsaamheid een wyse wat ons 'immuniteit' teen siekte kan opbou?
3. Melaatsheid begin klein en versprei (vermeerder) dan tot dit die hele liggaam besmet. Is dit nie ook hoe sonde begin en vermeerder nie? Vergelyk Jak. 1:13 tot 15. Die melaatsse verloor uiteindelik sy vermoë om te kan voel. Is dit nie ook die toestand wat ons bereik

indien ons sonde in ons lewe toelaat? Raak ons nie ook naderhand 'ongevoelig' vir die stem van die Afgesonderde Gees nie?

Ontvang YHWH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

-O-O-O-O-O-O-O-

Shabbat Shalom.

Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.